

REGLUGERÐ

30

6. febr.

um skemmtanaskatt í Leirár- og Melahreppi.

1. gr.

Samkvæmt lögum nr. 34 frá 22. nóv. 1918, sbr. lög nr. 30 10. júní 1922 og lög nr. 61 11. júní 1938, skal greiða skatt af skemmtunum fyrir almenning, öðrum en héraðsmótum ungmennafélaga, sem haldnar eru í Leirár- og Melahreppi og aðgangur er seldur að.

2. gr.

Þessar skemmtanir eru skattskyldar og flokkast þannig:

I. flokkur:

- a. Hljómleikar og söngskemmtanir.
- b. Sjónleikir.
- c. Kappleikir og íþróttasýningar, sem aðrir en áhugamenn taka þátt í.
- d. Fyrirlestrar og upplestrar.
- e. Kvikmynda- og skuggamyndasýningar.

II. flokkur:

- a. Dansleikar.
- b. Danssýningar.
- c. Loddara- og fjölleikasýningar.
- d. Aðrar almennar skemmtanir, sem aðgangur er seldur að, en ekki eru taldar sérstaklega.

3. gr.

Að skemmtunum þeim, sem falla undir I. fl. skal greiða 10% af aðgöngueyri, og af þeim, sem taldar eru í II. flokki 20%. Ef skemmtun er margþætt, skal skatturinn jafnan miðaður við þann þátt hennar, sem hærra er skattlagður.

4. gr.

Undantekningar frá skattgreiðslu veitir hreppsnefnd, er sérstakar ástæður eru fyrir hendi, t. d. fyrir skemmtanir, sem haldnar eru í góðgerðaskyni eða fræðslu, til styrktar listum o. s. frv.

5. gr.

Hreppsnefnd Leirár- og Melahrepps hefur eftirlit með því, að reglugerð þessari sé hlýtt, og sér um innheimtu skattsins. Ræður hún til þess sérstakan mann fyrir sína hönd, og nefnist hann eftirlitsmaður skemmtana.

6. gr.

Hver sem halda vill skemmtun, sem aðgangur er seldur að, skal tilkynna eftirlitsmanni skemmtana, hvar og hvenær skemmtunin skuli haldin.

7. gr.

Aðgang má eigi selja að skemmtun, nema gegn aðgöngumiða, sem eftirlitsmaður skemmtana hefur stimplað og afhent, enda skal hann ávallt hafa fyrirbyggjandi nægar birgðir af þeim. Kostnaður við þá greiðist af skatttekjum, en gerð þeirra ákveður hreppsnefnd. Um leið og aðgöngumiðar eru afhentir, skal færa í þar til gerða bók tölu þeirra og verð, og reikna út fjárhæð skattsins. Seljist ekki allir aðgöngumiðar, skal afgangur þeirra afhentur eftirlitsmanni, og dregst þá frá skattur af þeim aðgöngumiðum, sem óseldir eru. Á hvern aðgöngumiða skal skráð verð hans.

30

6. febr.

8. gr.

Þóknun til eftirlitsmanns fyrir starf hans ákveður hreppsnefnd og skal hún vera ákveðinn hundraðshluti af innheimtum skatttekjum og greiðast af þeim.

9. gr.

Forstöðumaður skemmtunar ber ábyrgð á greiðslu skattgjaldsins. Ef fleiri en einn maður stendur fyrir skemmtun, ábyrgist einn fyrir alla og allir fyrir einn, eða ef um félög er að ræða, þá allir stjórnendur þess á sama hátt.

10. gr.

Skattgjald skal greiða eftirlitsmanni um leið og stimplaðir aðgöngumiðar eru afhentir. Nú afhendir eftirlitsmaður stimplaða aðgöngumiða án þess að gjaldið sé greitt, og ber hann þá ábyrgð á greiðslu þess. — Skattgjaldið má taka lögtaki.

11. gr.

Skatttekjur skulu lagðar í sjóð, og varið til að starfrækja sundlaug, heimavistar-skóla eða bókasafn. Sjóðurinn skal vera í umsjá hreppsnefndar.

12. gr.

Brot gegn reglugerð þessari varða sektum allt að 1000 — þúsund — krónum. Sé brotinu þannig háttað, að dreginn hafi verið undan skemmtanaskattur, skal sektin ákveðin sem svarar minnst fjórföldum skatti, sem undan var dreginn, þó aldrei yfir 1000 krónur. Mál, sem rísa út af reglugerð þessari, skal fara með sem almenn lögreglumál.

13. gr.

Reglugerð þessi, sem samin er af hreppsnefnd Leirár- og Melahrepps, staðfestist hér með til að öðlast þegar gildi.

Menntamálaráðuneytinu, 6. febrúar 1946.

Brynjólfur Bjarnason.

Birgir Thorlacius.

31

8. febr.

Staðfesting forsetans á skipulagsskrá „Líknarsjóðs Snæfjallahrepps“, útgefin á venjulegan hátt að mandatum af dómsmálaráðherra 8. febrúar 1946. Skipulagsskráin er þannig:

SKIPULAGSSKRÁ

Líknarsjóðs Snæfjallahrepps.

1. gr.

Sjóður þessi, sem nefnist Líknarsjóður Snæfjallahrepps, er stofnaður 1. desember 1941 með 600 — sex hundruð — króna gjöf til minningar um Guðmund Jónsson frá Unaðsdal

Skipulagsskrá fyrir sjóðinn hefur ekki verið samin fyrr, og þykir gefendum og stjórn sjóðsins nauðsyn á að fá hana staðfesta. Í sjóði eru nú kr. 2539.00.